

Uvestg roga per perdun

In stgandler da la «cruschada» en las Pireneas

DA GUIU SOBIELA-CAANITZ

■ **1208 e puspè 1219 ha il papa clamà si ina cruschada cunter ils catars, «eretics» occitans, e lur duca da Toulouse (per occitan Tolosa). Suenter la capitulaziun dal duca 1229 ha papa Gregori IX (Ugolino dei conti di Segni, †1241) incumbensà ils dominicans e pli tard er ils franciscans da cumbatter ils «eretics».** Enturn 1230 è il chastè-fortezza da Montsegur, a sid da Tolosa (1207 m sur la mar), vegnì in center catar. Truppas franzosas l'han bloccà da la stad 1243 fin a mars 1244; la finala ha la garnischun catarà stui capitular. Var 215–220 catars han refusà da sa suttametter a la baselgia catolica; lur èni vegnids ars. Quai è stà in dals molts stgandlers da lezza «cruschada». La citad da Pàmias (per franzos Pamiers), tranter Tolosa e Montsegur, era ed è ina citad impurtanta sin la strada che maina en Catalugna. 1269 èn naschidas a Pàmias ina claustra dominicana ed ina franciscana. 1295 ha papa Bonifaci VIII (†1303, Benedetto Caetani) institui l'investgieu da Pàmias sco center catolic en ina regiun nua ch'il catarissem surviveva. In cisterziens da Savardun, tranter Tolosa e Pàmias, è stà 1317–1326 uvestg da questa citad ed ha sco tal cumbattì ils catars; 1334 è el vegnì papa Benedetg XII (†1342).

Duas confessiuns

Ils temps èn sa midads. Ma Pàmias (15 744 olmas) è anc adina residenza episcopala, cun ina catedrala ed ina baselgia reformada. La diocesa, ufficialmain «diocèse de Pamiers (-Couserans-Mirepoix)»,

cumpiglia bunamain l'entir district da l'Arieja (creà 1790, oz 152 684 olmas); las Pireneas la separan da la Catalugna e culmineschan a 3143 m (Pica d'Estats). Il Couserans (occitan Coserans) è la part vest da l'Arieja cun in'atgna catedrala. La vischnanca da Mirepoix (3136 olmas) è situada en la part nordost. In protestantissem resistent è sa sviluppà durant il 16avel tschientaner en il contadi da Foix (occitan «Fois»). Sin l'intschess da la diocesa datti oz var quindesch plaivs reformadas – a Pàmias, Foix (9703 olmas), Savardun (4503 olmas) euv. L'uestg da Pàmias è dapi 2014 Jean-Marc Eychennes, naschì là ils 2 da november 1956. El vul rugar per perdun ils 16 d'october 2016 a Montsegur, en num da la baselgia catolica a l'Arieja, per il stgandler dal 16 da mars 1244: «Nus rugain Dieu per perdun perquai ch'ina part da nossa gliעד ed insaquantas da nossas instituziuns han fatg part d'acziuns cuntrarias a l'evangeli. Tras quest ans cumonda Cristus da charrezar il proxim e da na render violenza per violenza.» Era dominicans fan part da l'occurrenza a Montsegur.

L'odi occitan cunter sasez

Il schurnalist catalan Joan-Lluís Lluís (1) è persvas ch'i saja raschunaivel da sa perstgisar per in malfatg commess avant otg tschientaners, sche la dolor subsista. El rapporta davart decleraziuns d'uestg Jean-Marc al telefon: «Ils fatgs dal 13avel tschientaner, ha lez ditg, marcan anc adina profundament il subconscious collectiu dal lieu. Oz èsi noss duair da dir cler e net che la finamira na giustifitgescha betg ils mezs. Las executiuns ed il

squitsch cunter ils catars eran tuttafatg cuntrarìs al spiert ed a la logica da l'evangeli (...). La finfinala munta quai era reflectar al drama dals fugitivs oz e far endament che generaziuns futuras ans pudessan renfatschar che nus n'hajan betg fatg avunda (...). En in intschesch periferic sco quest [l'antierur contadi da Foix] sa conserva il sentiment da marginalità, d'esser da memia». Er il plevon occitan ed autur (2) che pina l'occurrenza dals 16 d'october «discurra d'in subconscious collectiu marcà da la dolor. El rapporta che bliers umans en sia plaiv hajan manifestà lur emozion e perfin lur allegria areguard il giavisch [da la baselgia] da vegnir perdunada (...). En sia lavur davart ils catars a l'Arieja punctuescha quel plevon che lezza 'cruschada' haja dà als retgs da Frantscha l'occurrenza da conquistà in vast territori ritg e sviluppà. Per ina gronda part da l'intschess occitan muntava quai la perdita da l'indipendenza politica, l'entschatta da l'etnicidi e da l'odi occitan cunter sasez. Igl è cler ch'il stadi franzos è quel che duess rugar per perdun, perquai ch'el ha cuntrau en la republica las politicas monarchicas d'assimilaziun.» Questas na donnegian betg mo ils pajais occitans (3), mabain tut quellas parts da la Frantscha cun auters linguatgs indigens – basc, breton, catalan, flam, talian, tudestg euv.

1. <http://www.vilaweb.cat/noticies/el-perdodemnat-als-catars>
2. Edouard de Laportalière, autur da: *Catharisme et néocatharisme en terre d'Ariège*. Lacour-Ollé (colpmaud@bbox.fr, ISBN 2-7504-0503-3) Nîmes 2004.
3. V. «Il temp dals retgs» (La Quotidiana, 7 da settember 2016, p. 11).